

বিশ্বে ফুল

উৎসর্গ
'বীর বাদলকে'

[ঝিঙে ফুল]

ঝিঙে ফুল ! ঝিঙে ফুল !
সবুজ পাতার দেশে ফিরোজিয়া ফিঙে-কুল—
ঝিঙে ফুল ।

গুলো পর্ণে
লতিকার কর্ণে
ঢলঢল স্বর্ণে
ঝলমল দোলো দুল—
ঝিঙে ফুল ॥

পাতার দেশের পাখি বাঁধা হিয়া বোঁটাতে,
গান তব শুনি সাঁঝে তব ফুটে ওঠাতে ।

পউষের বেলাশেষ
পরি জাফরানি বেশ
মরা মাচানের দেশ
করে তোলা মশগুল—
ঝিঙে ফুল ॥

শ্যামলী মায়ের কোলে সোনামুখ ঝুকু রে,
আলুখালু ঘুমু যাও রোদ্দে-গলা দুকুরে ।
প্রজ্ঞাপতি ডেকে যায়—
'বোঁটা ছিড়ে চলে আয় !'
আসমানে তারা চায়—
'চলে আয় এ অকুল !'
ঝিঙে ফুল ॥

তুমি বলো—'আমি হায়
ভালোবাসি মাটি-মা'য়,
চাই না ও অলকায়—
ভালো এই পথ-ভুল !'
ঝিঙে ফুল ॥

খুকি ও কাঠবেরালি

কাঠবেরালি ! কাঠবেরালি ! পেয়ারা তুমি খাও ?
গুড়-মুড়ি খাও ? দুধ-ভাত খাও ? বাতাবি নেবু ? লাউ ?
বেরাল-বাচ্চা ? কুকুর-ছানা ?-তাও ?—

ডাইনি তুমি হাঁৎকা পেটুক,
খাও একা পাও যেথায় যেটুক !

বাতাবি-নেবু সকলপ্তলো

একলা খেলে ডুবিয়ে নুলো !

তবে যে ভারি ল্যাজ উঁচিয়ে পুটুস্ পাটুস্ চাও ?
হোঁচা তুমি ! তোমার সঙ্গে আড়ি আমার ! যাও !

কাঠবেরালি ! বাঁদরিমুখি ! মারব ছুঁড়ে কিল ?
দেখবি তবে ? রাঙাদাকে ডাকব ? দেবে টিল !

পেয়ারা দেবে ? যা তুই ঠুঁচা !

তাইতে তো তোর নাকটি বোঁচা !

হুতমো-চোখি ! গাপুস্ গুপুস্

একলাই খাও হাপুস্ হুপুস্ !

পেটে তোমার পিলে হবে ! কুড়ি-কুণ্ডি মুখে !

হেই ভগবান ! একটা পোকা যাস্ পেটে ওর ঢুকে !

ইস্ ! খেয়ো না মস্তপানা ঐ সে পাকাটাও !

আমিও খুবই পেয়ারা খাই যে ! একটি আমায় দাও !

কাঠবেরালি ! তুমি আমার ছোড়দি হবে ? বৌদি হবে ? হুঁ !

রাঙা দিদি ? তবে একটা পেয়ারা দাও না ! উঃ !

এ রাম ! তুমি ন্যাটা পুঁটো ?

ফ্রকটা নেবে ? জামা দুটো ?

আর খেয়ো না পেয়ারা তবে,

বাতাবি নেবুও ছাড়তে হবে !

দাঁত দেখিয়ে দিচ্ছ যে ছুট ? অমা দেখে যাও !—

কাঠবেরালি ! তুমি মরো ! তুমি কচু খাও ! !

খোকার খুশি

কি যে ছাই ধানাই-পানাই—

সারাদিন বাজছে শানাই,

এদিকে কারুর গা নাই

আজি না মামার বিয়ে !

বিবাহ ! বাস, কি মজা !

সারাদিন মণ্ডা গজা

গপাগপ খাও না সোম্জা

দেয়ালে ঠেসান্ দিয়ে ।

তবু বর হচ্ছিলে ভাই,

বরের কি মুশ্ লটাই—

সারাদিন উপোস মশাই

শুধু খাও হরিমটর !

শোনো ভাই, মোদের যবে

বিবাহ করতে হবে—

‘বিয়ে দাও’ বলব, ‘তবে

কিছুতেই হচ্ছিলে বর !’

সত্যি, কও না মামা,

আমাদের অম্নি জামা

অম্নি মাথায় ধামা

দেবে না বিয়ে দিয়ে ?

মামি-মা আস্লে এ ঘর

মোদেরও করবে আদর ?

বাস, কি মজার খবর !

আমি রোজ্জ করব বিয়ে ॥

খাঁদু-দাদু

অ মা ! তোমার বাবার নাকে কে মেরেছে ল্যাং ?

খাঁদা নাকে নাচ্ছে ন্যাাদা—নাক্ ডেঙাডেং ড্যাং ।

গুর নাকটাকে কে করল খাঁদা ঝাঁদা বুলিয়ে ?
চাম্চিকে-ছা বসে যেন ন্যাজুড় বুলিয়ে !
বুড়ো গরুর টিকে যেন শুয়ে কোলা ব্যাং !
অ মা ! আমি হেসে মরি, নাক ডেঙাডেং ড্যাং !

গুর খঁদা নাকের হেঁদা দিয়ে টুকি কে দেয় টু !
ছোড়দি বলে সর্দি ওটা, এ রাম ! ওয়াক্ ! থুঃ !
কাছিম স্কেম উপুড় হয়ে ছড়িয়ে আছেন ঠ্যাং !
অ মা ! আমি হেসে মরি, নাক ডেঙাডেং ড্যাং !

দাদু বুঝি চীনাম্যান্ মা, নাম বুঝি চাং চু,
তাই বুঝি গুর মুখটা অমন চ্যাপটা সুখাংশু !
জাপান দেশের নোটিশ উনি নাকে ঔঁটেছেন !
অ মা ! আমি হেসে মরি, নাক ডেঙাডেং ডেং !

দাদুর নাকি ছিল না মা অমন বাদুড়-নাক,
ঘুম দিলে ঐ চ্যাপটা নাকেই বাজত সাতটা শাঁখ !
দিদিমা তাই থ্যাবড়া মেরে ধ্যাবড়া করেছেন !
অ মা ! আমি হেসে মরি, নাক ডেঙাডেং ডেং !

লক্ষ্মানন্দে লাফ দিয়ে মা চলতে বেজির ছা
দাড়ির জ্বলে পড়ে জাদুর আটকে গেছে গা,
বিল্লি-বাচ্চা দিল্লি যেতে নাসিক এসেছেন !
অ মা ! আমি হেসে মরি, নাক ডেঙাডেং ডেং !

দিদিমা কি দাদুর নাক টাঙতে 'আল্‌মানাক'
গজাল ঠুকে দেছেন ভেঙে বাঁকা নাকের কাঁখ ?
মুচি এসে দাদুর আমার নাক করেছে 'ট্যান' !
অ মা ! আমি হেসে মরি, নাক ডেঙাডেং ড্যাং !

বাঁশির মতন নাসিকা মা মেলে নাসিকে,
সেথায় নিয়ে চলো দাদু দেখন-হাসিকে ।
সেথায় গিয়ে করুন দাদু গরুড় দেবের ধ্যান,
ঝাঁদু দাদু নাকু হবেন, নাক ডেঙাডেং ড্যাং ।

দিদির বে' তে খোকা

'সাত ভাই চম্পা জাগো—
 পারুলদি ডাকল, না গো ?
 একি ভাই, কাঁদচ ?—মা গো
 কি যে কয়—আরে দুস্তুর !
 পারায়ে সপ্ত-সাগর
 এসেছে সেই চেনা-বর ?
 কাহিনীর দেশেতে ঘর
 তোর সেই রাজপুত্র ?

মনে হয়, মণ্ডা মেঠাই
 খেয়ে জোর আয়েশ মিটাই !—
 ভাল ছাই লাগছে না ভাই,
 যাবি তুই একেলাটি !
 দিদি, তুই সেথায় গিয়ে
 যদি ভাই যাস্ ঘুমিয়ে,
 জাগাব পরশ দিয়ে
 রেখে যাস সোনার কাঠি ।

মা

যেখানেতে দেখি যাহা
 মা-এর মতন আহা
 একটি কথায় এত সুধা মেশা নাই,
 মায়ের মতন এত
 আদর সোহাগ সে তো
 আর কোনোখানে কেহ পাইবে না ভাই ।

হেরিলে মায়ের মুখ
 দূরে যায় সব দুখ,
 মায়ের কোলেতে শুয়ে জুড়ায় পরান,
 মায়ের শীতল কোলে
 সকল যাতনা ভোলে
 কত না সোহাগে মাতা বুকটি ভরান।

কত করি উৎপাত
 আব্দার দিন রাত,
 সব সন হাসি মুখে, ওরে সে যে মা !
 আমাদের মুখ চেয়ে
 নিজে রন নাহি খেয়ে,
 শত দোষে দোষী তবু মা তো ত্যাজে না।

ছিনু খোকা এতটুকু,
 একটুতে ছোট বুক
 যখন ভাঙিয়া যেত, মা-ই সে তখন
 বৃকে করে নিশিদিন
 আরাম-বিরাম-হীন
 দোলা দিয়ে শুধাতেন, 'কি হলো খোকন?'

আহা সে কতই রাতি
 শিয়রে ছালায়ে বাতি
 একটু অসুখ হলে জাগেন মাতা,
 সব-কিছু ভুলে গিয়ে
 কেবল আমারে নিয়ে
 কত আকুলতা যেন জগন্মাতা।

যখন জনম নিনু
 কত অসহায় ছিনু,
 কাঁদা ছাড়া নাহি জানিতাম কোনো কিছুর
 ওঠা বসা দূরে যাক—
 মুখে নাহি ছিল বাক,
 চাহনি ফিরিত শুধু মার পিছু পিছু !

তখন সে মা আমার
চুমু খেয়ে বারবার
চাপিতেন বুকে, শুধু একটি চাওয়ায়
বুঝিয়া নিতেন যত
আমার কি ব্যথা হতো,
বলো কে এমন স্নেহে বুকটি ছাওয়ায় !

তারপর কত দুখে
আমারে ধরিয়া বুকে
বসিয়া তুচ্ছে মাতা দেখ কত বড়,
কত না সে সুন্দর
এ দেহ এ অন্তর
সব মোরা ভাইবোন হেথা যত পড়ো।

পাঠশালা হতে যবে
ঘরে ফিরি যাব সবে,
কত না আদরে কোলে তুলি নেবে মমতা,
খাবার ধরিয়া মুখে
শুধাবেন কত সুখে
'কত আজ লেখা হলো, পড়া কত পাতা?'

পড়ালেখা ভাল হলে
দেখেছ সে কত ছলে
ঘরে ঘরে মা আমার কত নাম করে !
বলে, 'মোর খোকামণি।
হীরা-মানিকের খনি,
এমনটি নাই কারো !' শুনে বুক ভরে।

গাটি গরম হলে
মা সে চোখের জলে
ভেসে বলে, 'ওরে জাদু কি হয়েছে বল !'
কত দেবতার 'থানে
পীরে মা মানত মানে—
মাতা ছাড়া নাই কারো চোখে এত জ্বল।

যখন ঘুমায়ে থাকি
 জাগে রে কাহার আঁখি
 আমার শিয়রে, আহা কিসে হবে ঘুম !
 তাই কত ছড়া গানে
 ঘুম-পাড়ানিরে আনে,
 বলে, 'ঘুম ! দিয়ে যা রে খুকু-চোখে চুম !'

দিবানিশি ভাবনা
 কিসে ক্লেশ পাব না,
 কিসে সে মানুষ হব, বড় হব কিসে ;
 বুক ভরে ওঠে মার
 ছেলেরি গরবে তাঁর,
 সব দুখ সুখ হয় মায়ের আশিসে ।

আয় তবে ভাই বোন,
 আয় সবে আয় শোন্
 গাই গান, পদধূলি শিরে লয়ে মার ;
 মার বড় কেউ নাই—
 কেউ নাই কেউ নাই !
 নত করি বল সবে 'মা আমার ! মা আমার !'

খোকার বুদ্ধি

চুন করে মুখ প্রাচীর স্পরে বসে শ্রীযুত খোকা,
 কেননা তার মা বলেছেন সে এক নিরেট বোকা।
 ডানপিটে সে খোকা এখন মস্ত একটা বীর,
 হুক্মারে তাঁর হাঁস মুরগির ছানার চক্ষুস্থির !
 সাত লাঠিতে ফড়িং মারেন এমনি পালোয়ান !
 দাঁত দিয়ে সে ছিঁড়িলে সেদিন আস্ত আলোয়ান !

ন্যাথটা-পুঁটো দিগম্বরের দলে তিনিই রাজা,
 তাঁরে কিনা বোকা বলা ? কি এর উচিত সাজা ?
 ভাবতে ভাবতে খোকার হঠাৎ চিন্তা গেল খেমে,
 সে দৌড় চোঁ-চোঁ আঁধমহলে পাঁচিল হতে নেমে ।
 বুকের ভেতর ছ'পাই ন'পাই ধুকপুকুনির চোটে,
 বাইরে কিন্তু চতুর খোকা ঘাবড়ালেন না মোটে ।
 হাঁপিয়ে এসে মায়ের কাছে বললে, ওগো মা !
 আমি নাকি বোক-চন্দর ? বুদ্ধি দেখে যা !
 ঐ না একটা মটকু বানর দিব্যি মাচায় বসে
 লাউ খাচ্ছে ? কেউ দেখেনি দেখি আমিই তো সে ।
 দিদিদেরও চোখ ছিল তো, কেউ কি দেখেছেন ?
 তবে আমায় বোকা কও যে ! ঐ্যা-ঐ্যা, হাসো ক্যান ?
 কি কও ? 'একি বুদ্ধি হলো ?' দেখরে তবে ? হাঁ,
 বুদ্ধি আমার ... ভোলা ! তু-উ-উ ! লৌ-হা হ-হ-হা !

খোকার গপ্প বলা

মা ডেকে কন, 'খোকন-মণি ! গপ্প তুমি জানো ?
 কও তো দেখি বাপ !'

কাঁথার বাহির হয়ে তখন জোর দিয়ে এক লাফ
 বললে খোকন, 'গপ্প জানি, জানি আমি গানও !'
 বলেই খুদে তানসেন সে তান জুড়ে জোর দিল—
 'একদা এক হাড়ের গলায় বাঘ ফুটিয়াছিল !'

মা সে হেসে তখন
 বলেন, 'উইঁ, গান না, তুমি গপ্প বলা খোকন !'
 ন্যাথটা শ্রীযুত খোকন তখন জোর গম্ভীর চালে
 সটান কেদারাতে শুয়ে বলেন, 'সত্যিকালে
 এক যে ছিল রাজা আর মা এক যে ছিল রানি,
 হাঁ মা আমি জানি,

মায়ে পোয়ে থাকত তারা,
 ঠিক যেন ঐ গৌদলপাড়ার জুজুবুড়ির পারা !
 একদিন না রাজা—
 ফড়িং শিকার করতে গেলেন খেয়ে পীপড়ভাজা !
 রানি গেলেন তুলতে কলমি শাক
 বাজিয়ে বগল টাক্ ডুমাডুম টাক্ !
 রাজা শেষে ফিরে এলেন ঘরে
 হাতির মতন একটা বেরাল-বাচ্চা শিকার করে।
 এসে রাজা দেখেন কি না, বাপ !
 রাজবাড়িতে আগোড় দেওয়া; রানি কোথায় গাপ !
 দুটোয় গিয়ে এলেন রাজা সতরটার সে সময় !
 বলো তো মা-মণি তুমি, খিদে কি তায় কম হয় ?
 টাটি-দেওয়া রাজবাড়িতে ওগো,
 পাস্তাভাত কে বেড়ে দেবে ?
 খিদের জ্বালায় ভোগো !
 ভুলুর মতন দাঁত খিচিয়ে বলেন তখন রাজা,
 নাদনা দিয়ে জরুর রানির ভাঙা চাই-ই মাজা।
 এর্মন সময় দেখেন রাজা আসচে রানি দৌড়ে
 সারকুঁড় হতে কাঁকড়া ধরে রাম-ছাগলে চড়ে !
 দেখেই রাজা দাদার মতন খিচ্‌মিচিয়ে উঠে—
 “হাঁরে পুঁটে !”
 বলেই খোকার শ্রীযুত দাদা সটান
 দুইটি কানে ধরে খোকার চড় কসালেন পটাম্।
 বলেন, “হাঁদা ! ক্যাবলাকাস্ত ! চাষাড়ে।
 গপ্প করতে ঠাঁই পাওনি চণ্ডুখুরি আষাড়ে ?
 দেবো নাকি ঠ্যাংটা ধরে আছাড়ে ?
 কাঁদেন আবার ! মারব এমন খাপড়,
 যে, কাঁদে তোমার পেটটি হবে কামারশালার হুপার !”
 চড়চাপড় আর কিলে,
 ভ্যাবাচ্যাকা খোকামণির চম্কে গেল পিলে !
 সেদিনকারের গপ্প বলার হয়ে গেল রফা,
 খানিক কিন্তু ভেড়ার ভঁা ডাক শুনেছিলুম তোফা !

চিঠি

[ছন্দ :—‘এই পথটা কা-টব
পাথর ফেলে মা-রব’]

ছোট বোনটি লক্ষ্মী
ভো ‘জটামু পক্ষী’ !
য়্যাঝড় তিন ছত্র
পেয়েছি তোর পত্র ।
দিইনি চিঠি আগে,
তাইতে কি বোন রাগে ?
হচ্ছে যে তোর কষ্ট
বুঝতেছি খুব পষ্ট ।
তাইতে সদ্য সদ্য
লিখতেছি এই পদ্য ।
দেখলি কি তোর ভাগ্যি !
ধামবে এবার রাগ কি ?
এবার হতে দিব্যি
এমনি করে লিখবি !
বুঝলি কি রে দুই
কি যে হলুম তুই
পেয়ে তোর ঐ পত্র—
যদিও তিন ছত্র !
যদিও তোর অক্ষর
হাত পা যেন যক্ষর,
পেটটা কারুর চিপ্সে,
পিঠটে কারুর টিপ্সে,
ঠ্যাংটা কারুর লম্বা,
কেউ বা দেখতে রস্তা !
কেউ যেন ঠিক ধাম্বা,
কেউ বা ডাকেন হাম্বা !
খুতুনো কারুর উচ্ছে,
কেউ বা ঝুলেন পুচ্ছে !

এক একটা যা বানান
 হাঁ করে কি জ্ঞানান !
 কারুর গা ঠিক উচ্ছের,
 লিখলি এমনি গুচ্ছের !
 না বোন, লক্ষ্মী, বুঝছ ?
 করব না আর কুছো !
 নইলে দিয়ে লক্ষ্য
 আনবি ভূমিকম্প !
 কে বলে যে তুচ্ছ !
 ঐ যে আঙুরগুচ্ছ !
 শিখিয়ে দিল কোন্ বি
 নামটি যে তোর জন্টি ?
 লিখবে এবার লক্ষ্মী
 নাম 'জটায়ু পক্ষী !'
 শিগগির আমি যাচ্ছি,
 তুই বুলি আর আচ্ছি
 রাখবি শিখে সব গান
 নয় ঠেঙিয়ে—অজ্ঞান !
 এখনো কি আচ্ছ
 খাচ্ছে জ্বরে খাপচু ?
 ভাঙেনি বৌদির ঠ্যাংটা।
 রাখালু কি ন্যাংটা ?
 বলিস্ তাকে, রাখালি !
 সুখে রাখুন মা কালী !
 বৌদিরে ক'স দোস্তি
 ধরবে এবার সত্যি।
 গপাস্ করে গিলবে
 য্যাষড় দাঁত হিলবে !
 মা মাসিমায় পেন্নাম
 এখন হতেই করলাম !
 স্নেহাশিস এক বস্তা,
 পাঠাই, তোরা লস তা !
 সাক্স পদ্য সবিটা ?
 ইতি । তোদের কবি—দা ।

প্রভাতী

ভোর হোলো
দোর খোলো
খুকুমনি ওঠো রে !
ঐ ডাকে
জুঁই-শাখে
ফুল-খুকি ছোটো রে !
খুকুমনি ওঠো রে !

রবি মামা
দেয় হামা
গায়ে রাঙা জামা ঐ,
দারোয়ান
গায় গান
শোনো ঐ, 'রামা হৈ !'

ত্যাঙ্জি নীড়
করে ভিড়
ওড়ে পাখি আকাশে,
এস্তার
গান তার
ভাসে ভোর বাতাসে ।

চুলবুল
বুলবুল
শিস্ দেয় পুন্সে,
এইবার
এইবার
খুকুমনি উঠবে !

খুলি হাল
তুলি পাল
ঐ তরী চলল,
এইবার
এইবার
খুকু চোখ খুলল !

আলসে
নয় সে

ওঠে রোজ সকালে,

রোজ তাই
চাঁদা ভাই

টিপ দেয় কপালে।

উঠল
ছুটল

ঐ খোকাখুকি সব,

'উঠেছে
আগে কে'

ঐ শোনো কলরব।

নাই রাত,
মুখ হাত

খোও, খুকু জাগো রে !

জয়গানে
ভগবানে

তুষ্টি বর মাগো রে !

লিচু-চোর

বাবুদের তাল-পুকুরে
হাবুদের ডাল-কুকুরে
সে কি বাস করলে তাড়া,
বলি থাম, একটু দাঁড়া !
পুকুরের ঐ কাছে না
লিচুর এক গাছ আছে না
হোথা না আস্তে গিয়ে
য়্যাঝড় কাস্তে নিয়ে

গাছে গ্যে যেই চড়েছি
 ছোট এক ডাল ধরেছি,
 ও বাবা, মড়াং করে
 পড়েছি সড়াং জোরে !
 পড়বি পড় মালির ঘাড়েই,
 সে ছিল গাছের আড়েই
 ব্যাটা ভাই বড় নচ্ছার,
 ধুমাধুম গোটা দুচার
 দিলে খুব কিন ও ঘুসি
 একদম জোরসে ঠুসি !
 আমিও বাগিয়ে ধাপড়
 দে হাওয়া চাগিয়ে কাপড়
 লাফিয়ে ডিঙনু দেয়াল,
 দেখি এক ভিটরে শেয়াল !
 আরে ধ্যাং শেয়াল কোথা ?
 ভেলোটা দাঁড়িয়ে হোথা !
 দেখে যেই অ্যাংকে ওঠা
 কুকুরও জুড়লে ছোটা !
 আমি কই কস্ম কাবার
 কুকুরেই করবে সাবাড় !
 'বাবা গো মা গো' বলে
 পাঁচিলের ফেঁকল গলে
 ঢুকি গ্যে বোস্দের ঘরে,
 যেন প্রাণ আসল ধড়ে !
 যাব ফের ? কান মলি ভাই,
 চুরিতে আর যদি যাই !
 তবে মোর নামই মিছা !
 কুকুরের চামড়া খিচা
 সে কি ভাই যায় রে ডুলা—
 মালির ঐ পিটনিগুলো !
 কি বলিস ? ফের হপ্তা ?
 তৌবা—নাক খপ্তা ।

হাঁদল-কুঁকুতের বিজ্ঞাপন

মিচ্কে-মারা কয় না কথা মনটি বড় খুঁতখুঁতে ।
 'ছিচকাঁদুনে' ভ্যাবিয়ে ওঠেন একটু ছুঁতেই না ছুঁতে ।
 ড্যাবরা ছেলে ড্যাব্‌ড্যাবিয়ে তাকিয়ে থেকে গলা ফুলান,
 সন্দেশ এবং মিষ্টি খেতে—বাসরে বাস—এক জাম্বুবান !
 নিম্নমুখো-যষ্টি ছেলে দশটি ছেলে লুকিয়ে খান,
 বদমায়েশির মাসি পিসি, আধখানা চোখ উঁচিয়ে চান !
 হাঁদারা হয় হন্দ বোকার, সব কথাতেই হাঁ করে !
 ডেপো চতুর আধ ইশারায় সব বুঝে নেয় বাঁ করে !
 ভোঁদা খোকার নামটি ভুঁদো বুদ্ধি বেজায় তার ভোঁতা ।
 সবচেয়ে ভাই ইবলিস হয় যে ছেলেদের ঘাড় কোঁতা ।
 পুঁয়ে-লাগা সুঁটকো ছেলে মুখটা সদাই মুচ্কে রয় !
 পেটফুলো তার মস্ত পিলে, হাত-পাগুলোও কুঁচকে রয় !
 প্যাটরা ছেলের য্যাক্‌ড পেট, হাত নুলো আর পা সক্র !
 চলেন যেন ব্যাংটি হো হো উ-র গজ-ঢাক গাল পুরু !
 গাব্দা ছেলের মনটি সাদা একটুকুতেই হন খুশি,
 আদর করে মা তারে তাই নাম দিয়েছেন মনটুসি ।
 ষাডের নাদ সে নাদুসনুদুস গোবর-গণেশ যে শ্রীমান,
 নাঁদার মতন য্যাভ ভুঁড়ি তাঁর চলতে গিয়ে হুমড়ি খান !
 ছ্যাঁচড় ছেলে বেদড় ভারি ধুমসুনি খায় সব কথায় ।
 উদ্‌মো ছেলে ছটফটে খুব একটুকুতেই উৎপুতায় !
 ফট্কে ছেলে ছটকে বেড়ায় আঁটি তারা বজ্জাতের,
 দুট্টু এবং চুলবুলেরা সবখানে পায় লজ্জা ঢের ।
 বোঁচা-নাকা খাঁদা যে হয় নাম রেখে তার চামচিকে,
 এসব ছেলে তেঁদড় ভারি ডরায় না দাঁত-খামচিকে !
 টুনিখুকির মুখটি ছোট টুনটুনি তার মন সরল,
 ময়না-মানিক নাম যার ভাই মনটি তারও খুব তরল !
 গাল টেবো যাঁর নাম টেবী তাঁর একটুকুতেই যান রেগে ।
 কান-খড়কে মায়ের লেঠা, রয় ঘুমুলেও কান জেঙ্গে ।
 খুদে খুকির নামটি টেপু মা-দুলালি আধদেরে ।
 ডব-পুকুনে আঁথকে ওঠে নাপতে দেখে আঁক করে !

পুঁটুরানি বাপ-সোহাগি, নন্দদুলাল মানিক মার,
 দাদু বুড়োর ন্যাওতা যে ভাই মটরু ছাগল নামটি তার !
 ভূতো ছেলে ঠগ বড় হয়, ভয় করে না কাউকে সে,
 নাই পরোয়া যতই কেন কিল আর থাপড় দাও ঠেসে ।
 দসিয় ছেলে ভয় করে না চোখ-রাঙানি ভূত-পেরেত,
 সতর-চোখি জুজুর খোঁজে বেড়িয়ে বেড়ায় রাতবিরেত !
 ডানপিটেরা বুল্বাপপুর গুলি-ডাণ্ডায় মন্দ খুব !
 বাঁদরা-মুখোর ভ্যাম্‌চিয়ে মুখ দাঁত ঝিচে বে-হন্দ ছব !
 বীর বাদল সে-দেশের তরে প্রাণ দিতে ভাই যে শিখে,
 আনবে যে সাত-সাগর-পারের বন্দিনী দেশ-লক্ষ্মীকে !
 কেউ যদি ভাই হয় তোমাদের এম্নিতর মর্দ ফের,
 হো হো ! তাকে পাঠিয়ে দেবো বাচ্চা হোঁদল কুঁকুতের !

ঠ্যাং-ফুলী

হো-হো-হো উরুরো হো-হো !
 হো-হো-হো উরুরো হো-হো
 উরুরো হো-হো
 বাস কি মজা !
 কে শুয়ে চুপ্ সে ভুঁয়ে,
 নারছে হতে পাশ কি সোজা !

হো-বাবা ! ঠ্যাং ফুলো যে !
 হাসে জোর ব্যাংগুলো সে
 ড্যাং তুলো তার
 ঠ্যাংটি দেখে !
 ন্যাং ন্যাং য্যাগ্‌গোদা ঠ্যাং
 আঁকে ওঠায় ডানপিটেকে !

এক ঠ্যাং তালপাতা তার
 যেন বাঁট হালকা ছাতার !

আর-পাটা তার
 ভিটরে ডাগর !
 যেন বাপ ! গোব্দা গো-সাপ
 পেট-ফুলো হুস্ এক অজাগর !

মোদোটার পিসশাশুড়ি
 গোদা-ঠ্যাং চিপশে বুড়ি
 বিশ্ব জুড়ি
 খিসসা যাহার !
 ঠে-ঠে ঠ্যাং নাক ডেঙা ডেং
 এই মেয়ে কি শিষ্যা তাহার ?

হাদে দেখ আসছে তেড়ে
 গোদা-ঠ্যাং ছাঁৎসে নেড়ে,
 হাসছে বেড়ে
 বৌদি দেখে !
 অ ফুলি ! তুই যে শুলি
 দ্যাখ্ না গিয়ে চৌদিকে কে !

বটু তুই জোর দে ভৌ দৌড়,
 রাখালে ! ভাঙবে গৌ তার
 নাদনা গুঁতোর
 ভিটিম্ ভাটিম্ !
 ধুমাধুম্ তাল্ ধুমাধুম্
 পুষ্ঠে,—মাথায় চাটিম্ চাটিম্ !

‘ইতু’ মুখ ভ্যাম্চে বলে—
 গোদা ঠ্যাং ন্যাংচে চলে
 ব্যাংছা যেন
 ইডিং বিডিং !
 রাগে ওর ঠ্যাং নড়ে জোর
 য্যাংদেখেহিস্—তিডিং তিডিং !

মলিনা ! অ খুকুনি !
 মা গো ! কি ধুকপুকুনি
 হাড়-শুণ্ডনি
 ভয়-তরাসে !
 দেখে ইস্ ভয়েই মরিস্
 ন্যাংনুলোটোর পাঁইতারাকে ।

গোদা-ঠ্যাং পুঁচকে মেয়ে
 আসে জোর উচকে ধেয়ে
 কুঁচকে কপাল,
 ইস্ কি রগড় !
 লেলিয়ে দে ঢেলিয়ে !
 ফোঁস্ করে ফের ! বিষ কি জ্বর !

ইন্দু ! দৌড়ে যা না !
 হাসি, তুই বগ্ দেখা না !
 দগ্ধে না !
 তোল্ তাতিয়ে !
 রেশু ! বাস, রগেই ঠ্যাঙাস্,
 বৌদি আসুন বোল্ তা নিয়ে !

আর না খাপচি খেলো !
 ওলো এ আচ্ছি যে লো,
 নাচছি তো খুব
 ঠ্যাং নিয়ে ওর !
 ব্যাচারির হ্যাং-ফ্যাসানির
 শেষ নেই, মুখ ভ্যাম্চিয়ে জোর !

ধ্যোৎ ! পা পিছলে যে সে
 পড়ে তার বিষ লেগেছে
 ইস্ ! পেকেছে
 বিষ-ফোঁড়া এক !

সে ব্যথায় ঠ্যাং ফুলে তাই
ঢাক হলো পান্ন পিঠ জোড়া দেখ্ !

আচ্ছু ! সত্যি সে শোন
কারু এক রত্তি যে বোন
দোষ নেই এতে
দোষ নিয়ে না !
আগে তোর ঠ্যাং ফুলে জোর,
তারপরে না দস্যিপনা !

আয় ভাই আর না আড়ি,
ভাব কর কাম্মা ছাড়ি,
ঘাড় না নাড়ি,
কসনে 'উই' !
লক্ষ্মী ! ধোৎ, শোক কি ?
ছিচ্-কাঁদুনে হসনে ইঁ ইঁ !

উষাদের ঘর যাবিনে ?
লাগে তোর লজ্জা দিনে ?
বজ্জাতি নে
রাখ্ তুলে লো !
কেন ? ঠ্যাং তেড়েং বেড়েং ?
হাসবে লোকে ? বয়েই গেল !

পিলে-পট্কা

উটমুখো সে সুটকো হাশিম,
পেট যেন ঠিক ভুটকো কাছিম !
চুলগুলো সব বাবুই দড়ি—
ঘুস্কো জ্বরের কাবুয় পড়ি !

তিন-কোনা ইয়া মস্ত মাথা,
 ফ্যাচকা-চোখো; হস্ত? হাঁ তা
 ঠিক গরিলা, লোবনে ঢ্যাঙা!
 নিটপিটে ঠ্যাং সজনে ঠ্যাঙা!
 গাইতি-দেঁতো, উচকে কপাল
 আঁৎকে ওঠেন পুঁচকে গোপাল!
 নাক খাঁদা ঠিক চাম্‌চিকেটি!
 আর হাসি? দাঁত খাম্‌চি সেটি!
 পাঁচের মতন থুতনো ব্যাকা!
 রগটিলে, হুঁ ভুতনো ন্যাকা!
 কান দুটো টান-ঠিক সে কুলো!
 তোবড়ানো গাল, টিকটা ছুলো!
 বগলা প্রমাণ ঘাড়টি সরু,
 চেঁচান যেন ঝাড় কি গরু!
 চলেন গিজাং উরর কোলা ব্যাঙ,
 তালপাতা তাঁর খুর-ওলা ঠ্যাঙ!
 বদরাগি তায় এক-খেয়ালি
 বাস রে! খেঁকি খ্যাক-শেয়ালি!
 ফ্যাচকা-মাত্তু ছিচকাঁদুনে;
 কয় লোকে তাই মিচকা টুনে!
 জগন্নাথী হুঁটো নুলো,
 লোম গায়ে ঠিক খুঁটোগুলো!
 ল্যাভেগুসি নড়বড়ে চাল!
 তুবড়ি মুখে চড়বড়ে গাল,
 গুজুর-ঘুগে, দেড়-পাঁজুরে,
 ল্যাডাগ্যাপচার, ন্যাড়-নেজুড়ে!
 বসেন সে হাড়-গোড়-ভাঙা 'দ,
 চেহারা দেখেই সব মামা 'থ'
 গিরগিটে তার ক্যাকলেসে ঢং
 দেখলে কবে 'খেৎ, এ যে সং!'
 খ্যাঙরা-কাটি আঙলাগুলো,
 কুঁদিলে শ্রীমুখ বাংলা চুলো!
 পেটফুলো ইয়া মস্ত পিলে,
 দৈবাত্তে তায় হস্ত দিলে
 জোর চাটতৎ, বিটকেলে চাঁই!

ইট খাবে নাকো সিট্কেলে ভাই !
 নাক বেয়ে তার ঝরুচে সিয়ান,
 ময়রা যেমন করছে ভিয়ান !
 স্বপন দেখেন হালকা নিঁদে—
 কুইনাইন আর কালকাসিদে !
 বদন সদাই তোলাে হাঁড়ি,
 গুড়মুড়ি খান ষোলো আড়ি !
 ঠোঁকরে সবাই ন্যাড়া মাথায়—
 শিলাবিষ্টি ছেঁড়া ছাতায় !
 রাঙ্কুসে ভাত গিলতে পারে
 বাপ রে, বিড়াল ডিঙতে নারে !
 হন না ভুলেও ঘরের বাহির,
 কাঁথার ভির জ্বরের জাহির !
 পড়বে কি আর, দূর ভূত ছাই,
 ওষুধ খেতেই ফুরসৎ নাই !
 বুঝলে ! যত মোটকা মিলে
 বাগাও দেখি পটকা পিলে !
 বাজবে পেটে তাল্ ভটাভট
 নাক খিনাখিন গাল ফটাফট !
 ঢাকডুবাদুব ইড়িং-বিড়িং
 নাচবে ফড়িং তিড়িং তিড়িং !
 চুপসো গালে গাব গুবাগুব
 গুপি-যস্তুর বাজবে বাঃ খুব !
 দিব্যি বসে মারবে মাছি,
 কাশবে এবৎ হাঁচবে হাঁচি !
 কিল্‌বিলিয়ে দুটো ঠ্যাং
 নড়বে যেমন ঠুটো ব্যাং ! !